

Gvangjsih Minzcuz Bau

Cawjguenj: Gvangsiah Bouxcuengh Swcigh Minzcuz Cunghgyau Swvu Veijyenzei

Cawjbanh: Gvangsiah Minzcuz Bause

Geiz neix 8 banj

广西民族报

Aenhauh okbanj: CN45-0036

B.2023

Nd.11 Ng.29

Liggaeuq gveijmaux nienz ndwencib cibcaet

Geizsoq: Gungh daih 3599 geiz

Liuz Ningz Caeuq Dunghsih Boux Ndaej Gaiq Daih Cib'it Mauzdun Vwnzyozciengj Doxraen

刘宁会见第十一届茅盾文学奖获得者东西

Mboengqneix, Gaiq Daih Cib'it Mauzdun Vwnzyozciengj fatciengj denlij youq Cezgyangh Dungzyangh Vuhcin banh, Swcigh Vwnzlenz cujsiz, Gvangsiah Cozgyah Hezvei cujsiz Denz Dailinz (bitmingz: Dunghsih) bien sawcuenh raez 《Hoizyiengj》ak gvaq gyoengq cozbiniy cambingz haenx, baenz gaiq Mauzdun vwnzyozciengj neix 5 bouh ndaej ciengj ndawde bouh ndeu. 11 nyied 24 hauh, Swcigh Dangjveij suhgi Liuz Ningz youq Nanzningz caeuq Dunghsih boux ndaej ciengj dawz mingzdaeuz dauqma neix doxraen, daiqbiuj Swcigh Dangjveij cukhoh de ndaej Mauzdun vwnzyozciengj.

Liuz Ningz naeuz, baez neix ndaej ciengj dienzbouj le gij hoengq boux canghraiz Gvangsiah caengz ndaej Mauzdun vwnzyozciengj gvaq,

dwg gienh saeh'angq daengx gih vwnzyigai ndeu. Maqmuengh Dunghsih gaemdawz mbat seizgei ndaej ciengj neix, daiqdaeuz haeujlaeg hagsib gvancez gij swhsiengj vwnzva Siz Ginbingz, daiq ndei aen doih "Vwnzyoz Gveigh", gungganq engq lai vunzmoq vwnzyoz, cauqguh hawj lwgminz, cuengqgo hawj seizdaih, haenqrengz doinyoengx gwnz roen moq Gvangsiah vwnzyi benz diegsang, bin byasang aeu ndaej cingzciik moq. Gvangsiah hwngfat ndei saed aen seiz gaenq daengz, heiqseiq gaenq baenz, maqmuengh gyoengq boux guhhong vwnzyi daengx gih danqhaen seizdaih moq hoenghwd, cungfaen vatcimh gij vwnzva swhyenz lai Betgveiq daihdeih, daj ndaw couqmaenh gij eijsik caezcaemh Cunghvaz Minzcuz, hwnqguh Bingzlu Yinhoz daengj gij

saedguh sengdoengh hwnqguh aen Gvangsiah maenghndei seizdaih moq aeu gij yingzyang cauqguh, gangj ndei gij gojgaeq Cungguek, gojgaeq Gvangsiah, youq gwnz roen moq haenqguh yiengh yendaiva Cungguek, raiz ok engq lai cozbiniy ndei hab seizdaih, hab Gvangsiah, hab lwgminz, caen'itbous guh ndei aen binjbaiz "Vwnzyoz Gveigh", vih giet sim comz rengz hwnqguh aen Gvangsiah maenghndei seizdaih moq guenqhaeuj rengz cingsaenz hung'ak.

Dunghsih gyo'mbaiq Swcigh Dangjveij gig yawjnaek caeuq haenqrengz haeujcoengh hong vwnzva, gaisau le Gvangsiah vwnzyoz saehnieb hwngfat caeuq bouxvunz cauqguh mizgven cingzgvang, naeuz aeu laebdaeb haeujlaeg hagsib gvancez gij

swhsiengj vwnzva Siz Ginbingz, ciuq gij baijbouh iugouz Swcigh Dangjveij, daiqdoengh engq lai canghraiz caeuq boux guhhong vwnzyoz yungz gij lijsiengj yisuz haeuj ndaw gij saehnieb dangj caeuq lwgminz bae, yungzhaeuj ndaw ciengzgingj hungmbwk hwnqguh aen Gvangsiah maenghndei seizdaih moq bae, comzyawj hwnqguh Bingzlu Yinhoz daengj cawjdae, din caij Betgveiq daihdeih, roengzsim cauqguh, cauq cingzciik ndei moq, mboujduenh gyalai gij rengz yingjyangj binjbaiz "Vwnzyoz Gveigh", roengzrengz vih doinyoengx Gvangsiah vwnzva saehnieb hwngfat ndei saed lai ok goengrengz.

(Cinz Yizcwz Cinz Gyangz daj 《Gvangsiah Yizbau》 genj aeu mbandj daeuj hoiz)

Fungsanh 38 Fanh Moux Cazyouz Baenz Sou Lai

凤山38万亩油茶喜丰收

11 nyied 23 hauh, youq Hozciz Si Fungsanh Yen Bingzloz Yauzcuz Yangh Hungliz Cunh Mbanjluzvangj, vunzlai Yauzcuz cingq bok naeng mak cazyouz. Seizneix Fungsanh daengx yienh ndaem cazyouz 38.03 fanh moux, faenbouh youq daengx yienh 10 aen yanghcin 96 aen cunh, miz 2.6 fanh ranz 11.3 fanh boux ndaem mak cazyouz. Bineix guj baenz mak 21707 dun, gai baenz cienz 4.3 ik maenz baedauq.

(Danz Gaijhingh ingj)



2023 Nienz Daengx Guek Heiq Deihfueng Ndei Comzyienj Yaek Youq Nanzningz Banh

2023 年全国地方戏精粹展演将在邕举行

Mboengqneix, dou cam mizgven bouhmonz roxyiuj, 2023 nienz daengx guek heiq deihfueng ndei comzyienj yaek youq 12 nyied 1 hauh daengz 8 hauh youq Nanzningz banh, daengzseiz 50 aen heiqmoeg daj daengx guek 27 aen swngj gih si 35 aen heiqcungj daeuj haenx yaek hwnj daiz yienj, langhbaij heiq deihfueng gij daegsaek gag miz, gij cingzciik gag miz, caezcaemh hwngfat, caezcaemh mwnhoengh.

2023 nienz daengx guek heiq deihfueng ndei comzyienj camgya lai, neiyungz lai, cawjdae, sienmingz, lai cungj heiq caemh yienj, gizdieg, heiqmoeg caeuq bouxyienj camgya comzyienj lai gvaq bi'gvaq. Cujveijvei daj daengx guek 100 lai aen heiqmoeg bauq ndawde senjleh 50 aen heiqmoeg (cezswjhi) daeuj comzyienj, miz Baekging, Gvangsiah, Sanhsih, Hozbwz, Sanghaij, Cezgyangh, Sanhdungh, Ningzya, Gizlinz daengj daengx guek

27 aen swngj, swcigh, cizyazsi 46 aen heiqduenz, miz Cinzgyangh, Yezdiu, Yigi, Gangi, Minji, Yungghi, Gveigi, Yezgi, Vahgijhi daengj 35 aen heiqcungj heiq deihfueng, Cezgyangh Yezgi 《Caencawdap · Gingdap》, Gvangsiah Caijdiugi 《Liuz Sanhej · Fwen Buenz》, Sanhsih Cingi 《Sueng Lungz Loengh Bet Sien》, Gyanghsih Gangi 《Henzdah Iu Youx》 daengj 50 aen heiqmoeg (cezswjhi) yaek gapbaenz 10 daiz cienciengz yienjok

caeuq haimuqsik baeqmuqsik yienjok.

Ciuq cam rox, baez hozdung neix dingmaenh aen cunghcij yisuz vih lwgminz, fei yienjok yaek cienzmienh doenggvaq aen bingzdaiz "Gvangsiah Vwnzva Leih", gai fei gyaqcienz daemq, bouxyawj ndaej doenggvaq bingzdaiz cawx fei caemh yiengjsouh gij youhvei seiz siuhfei "Cou Doeng youz Gvangsiah", daengz Gvangsiah Minzcuz Giyen heiqciengz yienhciengz yawj heiq.

(Cinz Vwnz)